

Flerschemerisch iss schee

... unn dess saach nitt nor ich, naa, aach enn ausgewachsene Professor, dess iss de Dr. Ernst Erich Metzner aus Risselsem. Unn deshalb hawwe merr sesomme mett emm junge Monn aus Flerschem, der sich auskennt mette Computer unn Alexander Rühl heeßt, e Seit gemacht im Internet, die heeßt *flerschemerisch.de* unn iss e elektronisch Werrderbuch. Uff dere Seit – dess heeßt so, awwer ess sinn mittlerweile schunn enn Haufe Seite! – wolle merr festhalle, wie dess Flerschemerische gebabbelt unn vor allem, wies geschriwwe werdd.

Dess heert sich so leicht oo, awwer hott ooner von eich dess schunn emol versucht? Gut, ich (unn doodemett Eiern Honnes) habb mehr als 280 Honnesse im Flerschemer Blättche geschriwwe, awwer ich moon halt, dass ess noch mehr Flerschemer Leit gewwe dut, die gern emol in unserne Mundart schreiwe dete, awwer sich nit getraue, weil se Ängst hawwe, sie dete was falsch mache.

Jetzt iss joo nitt gesaat, dass ich alles rischdisch mache unn schreiwe due, naa, unn desdeweche iss die Sach im Internet so gemacht, dass wer immer moont, er kennt was dezu beitraache, sich oiklinke unn Stellung nemme kann. Dann werdd, in e paar Monat odder villeicht erst in oons, zwaa Johnn, ebbes vorlieh, was merr dann in emm rischdische Buch, in emm „Flerschemer Werrderbuch“, unner die Leit bringe kann.

Jetzt kann ooner saache, ei so Werrderbicher gibt's doch schunn längst, ei gucke mol im Buchlade, doo finnsde enn gonze Haufe unn was wollt ihr dann noch? Ja, dess stimmt, awwer jed Mundart iss onnersder, sie ännert sich von Ort zu Ort, merr brauch nor nooch Hochem odder nooch Raunem, Fronkfort odder Meenz ze gieh, iwverall werdd e onner Mundart gebabbelt unn iwverall werddse onnerst geschriwwe. Grad bei uns gibt's joo mettem Moo unn mettem Boo unn mettem joo su vill Werrder mett emm longe o, dies schunn aach in de Näh von Flerschem nimmi so gibt.

Also wolle merr was mache, ess iss enn Haufe Arwett, awwer ess mächt Spass, weil aach so enn junge Mensch mettmache dut, unn merr eichentlich denke kennt, so e Mundart wie die flerschemer werdd mett uns Ältere aussterwe. Awwer ess gibt halt immer mehr Leit, die saache nitt nor, merr misst unser Muttersprooch erhalle unn aach uffschreiwe, naa, ess gibt, so denk ich, aach Leit, die dann wennse wisse wies geschriwwe werdd, aach in de Mundart dichte odder Geschichte schreiwe odder, wenn ich emol uffheer mettem Honnes im Blättche, moin Noochfolcher werdd, „Eiern Pitter“ odder „Eier Irmgard“ zum Beispill.

Also, wer Internet hott kann schunn emol enoigucke in www.flerschemerisch.de unn kann debei nitt nor schunn enn Haufe Werrder in Hochsprooch unn in Mundart finne, er kann aach, wener ins Mundart-Portal gieht, e Zwiegespräch vom Honnes mette Renate Mohr heern.

So, unn wenn die gonz Sach in emm Pressetermin publik gemacht worrn iss kennder noochlese, wie die Internet-Seit von unseren Zeidunge ringserum uffgenomme worrn iss. Unn wenn ooner krätscht dann wern merr uns bemiehe, ess immer widder e bissi besser ze mache.

Eiern Honnes